



MINNISBLAÐ

Viðtakandi: Skóla- og frístundaráð

Sendandi: Helgi Grímsson, sviðsstjóri skóla- og frístundasviðs

Efni: Varðandi tillögu borgarfulltrúa Sósíalistasflokks Íslands um aðgerðaáætlun gegn rasisma í skóla- og frístundastarfi

Á fundi borgarstjórnar þann 21. desember 2021 var samþykkt að vísa svohljóðandi tillögu borgarfulltrúa Sósíalistasflokks Íslands til meðferðar skóla- og frístundaráðs:

Skóla- og frístundasviði er falið að útbúa aðgerðaráætlun gegn rasisma í skóla- og frístundastarfi Reykjavíkurborgar. Hún verði nýtt þegar rasísk atvik eiga sér stað í skólaumhverfinu og verði jafnframt vegvísir fyrir þá fræðslu og símenntun sem þarf að eiga sér stað innan skólasamfélagsins. Markmiðið með aðgerðaráætluninni er að skýrir verkferlar séu til staðar um hvernig skuli bregðast við rasískum atvikum svo það lendi ekki á börnum eða foreldrum þeirra að bregðast við kynþáttafordómum og kynþáttahyggju í skólaumhverfinu. Þegar slík atvik eiga sér stað er mikilvægt að skólasamfélagið bregðist skjótt og vel við. Aðgerðaáætlunin þarf einnig að vera sýnileg. Þar sem ekki er hægt að sjá fyrir um öll atvik sem geta átt sér stað eða undir hvaða kringumstæðum rasismi getur komið fram, er mikilvægt að samtal og fræðsla fari reglulega fram og að úrbætur verði gerðar á því sem þarf að laga. Aðgerðaáætlunin fari yfir skóla- og frístundastarf og starf í félagsmiðstöðvum og tryggi að ekkert í starfinu sé útilokandi fyrir börn og ungmenni með dökkan húðlit. Aðgerðir tryggi að allt starfsfólk og stjórnendur fái reglulega fræðslu. Lagt er til að skóla- og frístundasvið leyti til aðila með reynslu á þessu sviði, t.a.m. aktivista og þeirra sem hafa séð um fræðslu á þessu sviði, og óski eftir liðsinni þeirra við mótnun aðgerðaráætlunarinnar. Þau sem komi að vinnunni fái greiddar þóknun fyrir starfsframlag sitt. Kostnaðarauki verði samþykktur með viðauka við fjárhagsáætlun.

Í Aðgerðaráætlun Reykjavíkurborgar gegn ofbeldi fyrir 2022 – 2024 sem samþykkt var á fundi borgarstjórnar 1. febrúar 2022 er sérstakur kafli sem nefnist „Sporna gegn Rasisma“ og „Öruggar borgir á Norðurlöndum“ þar sem lagðar eru til nokkrar aðgerðir sem snúa að forvörnum gegnum rasisma. Í aðgerð 43 er þar á meðal rætt um útgáfu fræðsluefnis um hættumerki þess að einstaklingar geti leiðst út í öfgahyggju og er lagt til að það verði á ábyrgð skóla- og frístundasviðs og mannréttindastjóra að útbúa slíkt efni. Í aðgerð 48 er lagt til að útbúið verði fræðsluefni um hatursorðræðu og ólýðræðislega orðræðu og er lagt til að það verði ábyrgð skóla- og frístundasviðs og mannréttindastjóra að útbúa slíkt efni.

Í tengslum við aðgerðaáætlun Reykjavíkurborgar gegn ofbeldi og tillögu borgarfulltrúa Sósíalistasflokks Íslands er lagt til að stofnaður verði starfshópur sem skipaður verði verkefnastjóra fjölménningar í grunnskóla- og frístundastarfi, verkefnastjóra fjölménningar í

leikskólastarfi, fulltrúa úr leikskóla, fulltrúa úr grunnskóla og fulltrúa úr frístundastarfi, fulltrúa frá alþjóðateymi velferðarsviðs og fulltrúa frá Mannréttinda- og lýðræðisskrifstofu Reykjavíkur. Alls verði starfshópurinn því skipaður af ofangreindum sjö fulltrúum. Hlutverk starfshópsins er m.a. að:

1. Vinna að verklagsreglum um viðbrögð við rasískum ummælum, skrifum og/eða hegðun hjá börnum og starfsfólki í skóla- og frístundastarfi.
2. Koma með tillögur að fræðsluefni og verkfærum fyrir öll skólastig og í frístundastarfi fyrir börn og ungmenni.
3. Koma með tillögur að fræðsluefni fyrir starfsfólk skóla- og frístundasviðs um hugtakanotkun, orðræðu og fræðslu um fjölbreyttan hóp fólks með ólíkan tungumála- og menningarbakgrunn.

Starfshópnum er ætlað að funda í 8–10 skipti á vorönn 2022. Gert er ráð fyrir fjarfundum sem verði 1,5 klst. í senn og að þeir verði haldnir vikulega.